

von Wulf Wager

## Pauschalurlaub – nia meh



Warat Sia schomol ema Pauschalurlaub? I grad 's erschte ond wahrscheinlich au 's letschte Mol. Mei Nochbere hot mr des empfohla. Sie hot me gfrogt, ob i scho meine Urlaubspläne gmacht hätt? "Noi, worom au?" han i zu ra gsait, "mei Frau bestemmt wo na, mei Chef bestemmt, wann, ond mei Bank bestemmt, wie lang mir fahrt!"

I ben no trotzdem en's Reisebüro. Des Fräulein dort hot gfrogt ob mir über Athen oder Bukarest fliega wellat? I han no gsait: "Noi, über Pfengshta!"

Jedafalls send mir no en soma Bettabunker glandet. Des Hotel am Strand war heillos überbucht, ond so hot mr ons en a anders Hotel brocht, wo mr "bloß" zwanzg Minuta mit em Auto zom Stand braucht hot. 's Essa war grausam. So grausam, dass net amol dia Engländer des gessa hend - ond denne graust 's jo sonscht vor garnix. Em Pool hot's koi Wasser ghet ond dia Zemmerwänd warat so dünn, dass mr jede Körper- ond Lebensäußerong von de Nebabewohner mitkriagt hot. Am Buffet ben i jeden Obend so ma Ellabogotyp mit russischem Akzent begegnet, der mi wie a angreifendes Nashorn von dr Futteraufnahme abdrängt hot.

Wenigschtens han i wega dem Typ ond wega dem Durchfall, den i wega dem Essa kriagt han, en dene zwoi grausame Pauschalurlaubswocha sechs Kilo abgnomma. Do hätt i drhoim mindeschtens vier Monat braucht.

I glaub wenn i mol wieder so stämmig ben, no gang i doch nomol en Pauschalurlaub ...

Bis näggschd Woch' Ihr

Alle Kolumna zom nochlesa  
ondr: [www.woascht.de](http://www.woascht.de)  
oder em Facebook em  
Wulf Wager Fanclub.